

**NATIONAL ASSEMBLY OF  
SEYCHELLES**

*Thursday 22<sup>nd</sup> February 2024*

*The Assembly met at 1701pm*

*National Anthem*

*Moment of Reflection*

*Mr Speaker in the Chair*

**MR SPEAKER**

Prezidan Repiblik Sesel,  
Ekselans Wavel Ramkalawan,  
*First Lady*, Mrs Linda  
Ramkalawan,  
Vis-Prezidan Ahmed Afif,  
Sef Ziz Lakour Siprenm,  
Prezidan Lakourdapel  
Sesel, Minis Dezinyen,  
Minis,  
Deputy Speaker Lasanble  
Nasyonal,  
*Leader* Lopozisyon,  
*Leader* Biznes  
Gouvernman,  
*Members of the Diplomatic  
Corps*,  
*Attorney Zeneral*,  
Komisyoner Lapolis,  
Sef Lafors Defans,  
Manm Lasanble Nasyonal,  
Ziz Lakourdapel,  
Ziz Lakour Siprenm.

Clerk e Deputy Clerk  
Lasanble Nasyonal, nou bann  
Envite Distenge.

Bonn apre midi e byenveni  
dan Lasanble Nasyonal ozordi,  
pour sa seremoni Ladres Leta  
Lanasyon par Prezidan Wavel  
Ramkalawan.

Mon swet zot byenveni  
avek gran ker, e akoz zot, zot  
plizyer zot i abitye antretenir  
avek nou dan nou Biznes  
Lasanble regilyerman.

E ozordi i en zour spesyal  
e mon vwar li en privez e en  
gran loner, pour mwan akey  
zot.

*Members of the Diplomatic  
Corps a special welcome to you  
and I am happy to have your  
presence in the National  
Assembly. I know many of you  
have visited, but it is an honor to  
have you with us today for this  
occasion.*

Avek sa, i mon plezir pour  
envit Prezidan Larepublik, pour  
prezant son Ladres lo Leta  
Lanasyon. Prezidan.

**THE PRESIDENT WAVEL  
RAMKALAWAN**

Mr Speaker e Mrs Mancienne,  
Linda,  
Vis-Prezidan Ahmed Afif,  
Sef Ziz Lakour Siprenm,  
Prezidan Lakour Siprenm,  
Minis Dezinyen,  
Minis,

Deputy Speaker Lasanble Nasyonal,  
*Leader* Lopoziyon,  
*Leader* Biznes Gouvernman,  
 Manm Kor Diplomatik - *Members of the Diplomatic Corps*,  
*Attorney Zeneral*,  
 Komisyoner Lapolis,  
 Sef Lafors Defans,  
 Manm Lasanble Nasyonal,  
 Ziz Lakourdapel,  
 Ziz Lakour Siprenm,  
 Clerk e Deputy Clerk Lasanble, tou bann Envite Distenge.

Les mwan premyerman Mr Speaker, eksprim avek gran santiman sa zoli memoryal ki Lasanble in ofer an memwar nou ser, Onorab Rosie Bistoquet apre midi.

Tou bann temwannayaz ki bann diferan Manm in eksprimen, in vreman tousan e mon krwar ki zot in donn Onorab Bistoquet sa loner ki vreman merite.

E mwan mon zwenn avek zot Lasanble Nasyonal, apre sa trazed, pour mwan ankor enn fwa partaz mwan senser kondoleans avek lafanmir.

Me osi avek zot bann dimoun ki'n travay pre avek Mis Rosie. Mon osi mon'n ganny sa privez pour travay avek li, pour akonpany li. E alors nou

tou nou vreman dan en moman soufrans.

Mon priye ki sa ki in travay, sa ki in fer pour nou pei Sesel, i ava toultan ganny marke, i ava toultan ganny mazine. E parey nou tou nou'n priye, ki son nanm i ava repoz anpe.

Mr Speaker, mon profite osi, parski dezyenm parti zot seremoni sete pour *swearing 2* nouvo Manm. Alors, mon profite pour mwan felisit sa de nouvo Manm, de nouvo madanm ki rantre dan Lasanble Nasyonal - Onorab Anne Bistoquet e Onorab Rachel Spiro.

Mon swete ki zot ava pas en bon moman dan Lasanble Nasyonal. Zot ava *enjoy* zot moman dan Lasanble Nasyonal, dan bann deba. E atraver zot kontribisyon, zot ava fer nou pei, nou program Lezislative e bann deba, zot ava ede pour anrisir sa deba.

Mr Speaker, o komansman mon diskour, mon anvi osi mazin plizyer nou bann Seselwa ki depi lannen pase in kit nou. Nou'n annan plizyer bann dimoun popiler. Me an menm tan osi bann dimoun ordiner, ki kit en mark lo nou sosyete.

Zis pour mwan mansyonn enn de bann non san ki mon

dekrir egzakteman ki zot in fer dan nou sosyete, e ki mannyer zot in bann zanfan Seselwa, ki nou'n annan bokou apresyasyon pour zot.

Mon krwar ki nou tou pour konnen egzakteman ki zot in fer. Letan mon mansyonn

bann dimoun parey

Tony Mathiot,

Norbert Salomon,

Per Gustave Lafortune,

Sister Josephine Bonnelame,

Patrick Stravens,

Norville Ernesta,

Terry Servina,

Margaret Pouponneau,

Andre Valmont,

Larsevek Émérite French-

Chang Him,

Michel Paddy Savy,

Raymond Hoareau, Praslin,

Charlet Ali,

Wahida Payet,

Dorothy Lafortune,

Hakeem Antoine,

Yacinthe Napoleon,

Robert Morgan,

Lewis Alexis.

E mon ti ava kapab kontinyen, parski in annan bokou nou bann Seselwa ki'n fer bann diferan kontribisyon, e ki'n osi viv bann lavi senp. Bann lavi ki'n montre, bann valer ki nou koman en pep nou atas nou avek.

E alor mon priye ki premyerman, i ava annan

bokou plis Seselwa ki ava mars dan zot legzanp, ki ava swiv bann bon legzanp ki zot in kite pour nou pei. E ki atraver sa, nou pei i ava anrisir, e nou pei i ava vin sa landrwa ki ozordi nou apel li paradi.

Me ki bann zenerasyon i ava kapab kontinyen viv avek lafyerte, avek rezilyans. E nou ava toultan fer nou paviyon, mont pli o posibil.

Mr Speaker, Lartik 65, nou Konstitisyon, i demande ki Prezidan ava o komansman sak lannen delivre en mesaz lo Leta Lanasyon avek Lasanble.

E mon letan mon regard sa lobligasyon konstitisyonnel, mon vwar li plito koman en moman kot avek Lasanble, e avek Lepep Seselwa, nou vin koz lo sa ki pe arive dan nou Leta.

Nou vin eksprim laverite, e nou regarde ansanm kot nou ete, kwa ki pe arive, e ki mannyer nou pour kapab avans pli devan ankor.

Byensir, en Prezidan i ganny sa loportinite pour li vin fer sa omwen 5 fwa, pandan en manda 5 an. E ozordi i fer mon katriyenm Leta Lanasyon. Lannen prosenn avek lagras Bondye, i ava mon senkyenm pour sa premye manda ki pour terminen an 2025.

Alor Mr Speaker, sa ki mon vwar ozordi, se en pei dinamik, en pei konplike, en pei ki'n *achieve* en kantite gran keksoz. Me an menm tan osi en pei ki letan i regard devan, i trouv bokou defi.

E dan milye sa bann sityasyon, i annan en keksoz ki tre enportan, se ki Lepep Seselwa i gard son linite; Lepep Seselwa i gard sa lespri kot napa diskriminasyon. Nou gard sa lespri rekonsilyasyon e nou osi gard sa lespri ki Sesel, i pa zis pour serten dimoun.

Me ki Sesel i pour sakenn parmi nou. E ki se ansanm ki nou larelizyon, ki nou kouler lapo, ki nou krwayans politik, oubyen ki nou tandans seksyel, nou tou, nou form en sel pep. E sa se Lepep Seselwa.

Mr Speaker, mon panse ki si nou kapab gard sa linite, e nou kapab mars dan menm direksyon, avek bann prensip ki pour ini; bann prensip ki pour fer nou sakenn antre nou viv pli for, Pti Sesel ki ozordi i deza en model dan Losean Endyen, en model lo nivo Lafrik.

Me non-solman lo nivo Lafrik ek Losean Endyen, Pti Sesel ki ozordi i en model mondyal, napa personn ki pour bar li!

Alor mon premye lapel avek Lepep Seselwa ozordi, se

pour nou gard nou linite; se pour nou gard sa lespri ki nou pei i pas avan tou. Nou paviyon fodre nou fer li flot pli o posibil.

E ki nou lafyerte se letan nou ed nou frer, nou ed nou ser e an fezan sa, nou asire ki lot zenerasyon, i ava kapab viv avek pli gran konfyans, avek pli gran solidite.

E ki pour bann zenerasyon ki ava swiv apre, Sesel i ava toultan en mo, e non ki donn bokou plezir, ki donn bokou lafyerte.

Mr Speaker, an menm tan mon mazine ki - ou konnen parfwa i annan en konfizyon. Parfwa dimoun i konfiz lo kwa ki Gouvernman. E mwan sa en keksoz ki mon bezwen dir ki ozordi an 2024, parfwa mon vwar ki dimoun i bliye sans Gouvernman.

Dimoun i krwar ki poudir Gouvernman i laba e Lepep Seselwa i en lot direksyon. Enn i dan nor, lot i dan sid. E alor se sa ki aprezan ozordi, souvandfwa dimoun i krwar ki zot ava demann Gouvernman pour fer isi; demann Gouvernman pour fer laba.

E dimoun alor i bliye ki poudir Gouvernman, i komans avek mwan koman en endividi. Ki poudir se sa ki mon fer, dan lafason ki mon pran swen avek mwan, dan lafason ki koman en

etidyan mon al lekol, mon etidye. E anmezir ki mon vin en adilt, mon aplik mwan seryezman pour mwan kapab pas mon legzanmen, pour mwan kapab ganny en metye, pour mwan kapab soutenir mon fanmir - ki poudir se sa osi, i form parti Gouvernman.

E an menm tan osi, dimoun parfwa Mr Speaker, i bliye ki poudir en pei i pour toultan annan en sel Gouvernman. I annan en sel Gouvernman. Se Ladministrasyon ki sanze. Me ki i pour toultan Gouvernman Sesel. E se pour sa rezon ki sa ki Ladministrasyon yer i fer, i pour swiv dan Ladministrasyon ozordi.

Sa ki Ladministrasyon ozordi i fer, i pour swiv dan Ladministrasyon demen. Alor i enportan pour ki, letan mon pe fer lapel pour ki nou sitwayen i viv dan linite. Nou sitwayen i koste zepol toultan ansanm, pour mwan osi demande ki sitwayen i pran son responsabilite.

Parski letan sakenn ant nou, nou pran nou responsabilite, se sa ki fer ki Gouvernman nou pei i mars byen, e Gouvernman nou pei i vin pli for. Akoz nou tou nou ava pe fer nou kontribisyon.

E Mr Speaker ou konnen, mon'n osi remarke ki, ozordi tanzantan ou tann dimoun pe dir, nou pour pourswiv Gouvernman. In ariv en keksoz, nou pour pourswiv Gouvernman. Nou pour rod isi avek Gouvernman.

Be mon anvi dir avek Lepep Seselwa, ki letan ou pourswiv Gouvernman, ofet ou a pe pourswiv ou prop lekor. Parski Gouvernman li i pa en antite lo li menm, ki annan en gro kof e ki letan ou pourswiv li, i zis al dan sa gro kof ki apel kof Gouvernman, e i tir larzan i donn ou.

Letan ou pourswiv Gouvernman, Gouvernman i pran larzan ki ou menm ou kontribye – ou kontribye koman *tax*, pour li pey ou. Gouvernman i pran larzan ki ou madanm, ou msye i kontribye, ou zanfan, ou tonton, ou kouzin, ou zanmi pour li pey ou.

Alors mon anvi ki nou sezi sa konsep Gouvernman. E si nou kapab konpran li byen e an menm tan osi travay pour nou ranforsi Gouvernman e pour nou asiste, akonpanyen, mon krwar ki nou pei pour vin en landrwa bokou pli agreab pour viv.

Me aprezan Mr Speaker - ou vwar sa i anmenn mwan lo en lot pwen; Ozordi dan nou

pei, nou pe sey fer bann diferan *training* pour nou kapab donn sa *leadership*, tou bann dimoun ki dan pozisyon *leadership*.

E ou ava rapel Mr Speaker, ki nou annan en group, en group *PSs*, *CEOs* e bann *top executives* dan nou pei, ki'n swiv en *Executive Leadership Program* atraver *UAE*.

E sa sete zisteman pour ed zot pour regard keksoz dan en diferan fason, regard *leadership* dan en diferan fason. E nou konnen osi ki poudir i annan lezot *training*.

E la a ler aktyel, i annan *training* ki pe, ki pe *go on*, pour ki nou kapab dan sa servis sivil, fer dimoun konpran. E sa i byen esansyel pour nou sezi. Ki poudir dan servis sivil letan ou ladan, sa mo sabotaz, pa sipoze egziste.

Ou en *civil service*, ou vini pour ou travay pour ou Gouvernman, ou vin travay pour Sesel. E la Mr Speaker, mon anvi dir klerman, dan lannen 2024 pour napa plas dan *civil service* pour okenn sabotaz, pour okenn trenn lipye.

E la mon anvi fer kler, Sesel pour tou son zanfan. Me move zanfan, ki pa anvi travay pour Sesel, pour ganny

demande pour zot aret travay e pour zot rod en lot travay.

**(APPLAUSE)**

**THE PRESIDENT WAVEL RAMKALAWAN**

Mon annons sa byen menm, byen boner, pour ki apre nou pa vin koz viktimizasyon politik. Si ou anvi travay, travay. I annan plas pour tou Seselwa vin travay. Me si ou pa anvi travay, nou pa pour kapab fer lotreman.

Mr Speaker, dan milye sa konteks nou Gouvernman, dan milye sa konteks nou demokrasi, nou bezwen kontinyen rod fason pour nou ranforsi nou demokrasi. E ozordi, Lepep Seselwa in konn en nouvo laliberte lekspresyon.

Tou dimoun i eksprim li ozordi.

Dimoun i lib pour li eksprim li. E atraver medya sosyal, atraver demonstrasyon, atraver bann manifestasyon, tou dimoun i kapab mars avek son *banner* e apiy sa ki li i anvi.

I ganny drwa eksprim li. E atraver sa nou'n osi asire ki nou ranforsi nou bann lenstitisyon.

E Mr Speaker nou bann lenstitisyon pe santi zot sitan ganny ranforsi, ki ozordi menm Gouvernman, dan L'Egzekitiv,

menm L'Egzekitiv parfwa i trouv li, dan serten difikilte.

Akoz lenstitisyon letan i dir non napa person ki kapab dir wi. E L'Egzekitiv i fer sir, ki a tou moman i annan lendepandans e i annan respe pour sa bann lenstitisyon.

Alors nou pour kontinyen ranforsi nou demokrasi. E letan nou pe ranforsi nou demokrasi, i annan serten keksoz ki nou demande.

Nou demande ki laverite i vin en prensip ki nou pa zanmen abandonnen. Ki tou bann dimoun ki pe eksprim zot, i vin koz laverite. E atraver laverite nou ava kapab edik nou pep.

E letan mon pe koz lo nou pep, nou a pe koz lo linite, nou a pe koz lo tousala, mwan mon anv i trouv en pep edike, en pep ki pa les li ganny deroute. E alor la mon anv i prensipalman mansyonn rol medya.

Mr Speaker parfwa koman bann dirizan, nou per pour mansyonn medya. Akoz nou krwar ki poudir si nou mansyonn medya, nou a pe enterfer dan medya.

Non! Napa okenn lenterferans. Rol medya i bezwen enn ki anmenn bann reportaz balanse. I bezwen enn ki ed sa Seselwa, letan i regard program Aktyalite, oubyen

Nouvel 8er diswar, oubyen i lir Nasyon, oubyen i li *Today*, oubyen i lir nenport zournal ki sa ki i lir i asosye avek laverite.

E ki sa pa fer ki i annan leokri parmi nou pep, kot i pa neser. E mwan se pour sa rezon osi ki ozordi letan mon pe lans sa lapel avek medya, pour fer sir ki zot fer bann reportaz balanse, e non pa bann reportaz *one-sided*.

Mon anv i osi dir avek nou pep. 'Pep Seselwa, pa zis akoz en keksoz i lo *Facebook* ki i laverite. Pa zis akoz en keksoz i lo *SBC*, medya ki Leta i finanse, oubyen ki i lo en medya endepandan, oubyen ki i lo en zournal enternasyonal ki i laverite.

Alors pep Seselwa, mon pep annou aprann ekoute, analize e apre sa fer komanter.

Tou keksoz ki ou ganny met devan ou, ekoute, ekout li byen, analize e balanse.

"Eski i posibil sa?"

"Eski i vre sa?"

E si nou pa tro konnen, annou rod plis lenformasyon.

E Mr Speaker, letan mon pe dir sa, mon anv i osi dir avek Lepep Seselwa, ki ozordi zot annan en Ladministrasyon ki ekoute;

En Ladministrasyon ki menm letan in fini fer bann konsiltasyon. Si i annan bann

lezot pwen ki vini, nou pare pour nou retir serten regilasyon.

Nou pare pour nou retir serten desizyon ki nou'n pran, pour nou kapab ekout ankor e pour nou kapab balanse.

Alor pa bezwen per sa Gouvernman. I pa en Gouvernman ki pa pare pour ekoute, o kontrè i en Gouvernman ki pare pour ekoute. E se pour sa rezon ki parfwa e in annan plizyer lenstans, kot letan konsiltasyon in ganny fer. E apre serten sitwayen i bliye ki poudir ki konsiltasyon in ganny fer.

E alor i annan en leokri, en leokri parfwa pouse par politisyen zot menm. E nou'n vwar ki poudir Gouvernman in pare pour li ekoute.

E la mon anvi donn zot en legzanp kot Gouvernman in ekoute depi yer swar.

Premyerman, letan mon dir koz laverite, i fo letan ou dir, '30 pye Takamaka pe al ganny koupe'.

Non! Sa i fo. Ou bezwen donn *facts*. 30 pye dibwa, parmi i annan pye Takamaka.

E alor in annan en pe leokri sorti kot bann diferan lorganizasyon lanvironnman. E Mr Speaker, swivan bann reprezantasyon ki sa bann lorganizasyon lanvironnman in

fer, ansanm avek Minis pour Lanvironnman e Minis Devika, pour Lantreprenarya, mwan mon'n dir "*pause*"! Napa okenn pye dibwa ki'n ganny koupe ozordi.

Demen ansanm ek sa de Minis, mon envit zot, nenport ant zot ki anvi vini. Mon mazine Onorab Beau Vallon i ava vini, nou ava retourn Beau Vallon pour nou regarde egzaktaman ki mannyer nou pour fer keksoz bouz devan.

Alor letan i annan moman kot nou ekout bann reprezantasyon, nou retournen pour nou pran aksyon apropiye.

Me i pa vedir ki i a tou moman bann reprezantasyon i pour termin dan sa ki bann ki a pe pous sa bann nide devan, i anvi.

Alor Mr Speaker, i enportan pour nou letan nou pe ranforsi nou demokrasi, pour nou kontinyen lager kont koripsyon. E koripsyon ozordi i kontinyen dan serten lenstans ravaz nou pei.

Dan bann pti lenstans, ou vwar kote koripsyon i ete. E erezman nou'n kapab lo plizyer repriz, met lanmen lo sa bann koripsyon e aret zot.

Mr Speaker, dan nou ranforsisman demokrasi, i pour bezwen kontinyen annan respe



pour tou bann lezot lenstitisyon.

Par egzanp respe pour brans Lezislativ, respe pour brans Zidisyer. Respe pour Biro *Attorney Zeneral*, ki prosekiter prensipal dan nou pei.

E tousala i ava fer koman en pep, nou viv anba sa ki nou kontan koz lo la. E zot dan Lasanble zot kontan koz lo la se, *'the rule of law'* e *'the rule of law'*, fodre ki pa okenn sitwayen i melanz li avek son apartenans politik.

E mon'n tande, bann lenstans kot dimoun in mal konpran *rule of law*. Senpleman akoz li in vot pour en serten parti politik e aprezan i krwar ki poudir Lalwa pa devret aplik pour li.

Non, Mr Speaker. Lalwa Sesel i aplik pour tou Seselwa. E si nou anvi, viv koman bann bon sitwayen nou devret swiv Lalwa.

E zisteman, ozordi mon pour osi anonse, ki dan premye parti sa lannen, an relasyon avek nou demokrasi pour nou fer sir ki, nou sorti dan sa faz kot ou tande ki poudir eleksyon pour fer 2024, eleksyon pour fer komansman 2025, ensidswit.

Mr Speaker, mon pour - nou pour envit zot koman Lasanble Nasyonal pour aprouv onzyenm lamannman

konstitisyonnel. E sa onzyenm lamannman konstitisyonnel, i pour swiv en promes dan manifesto *LDS*, lo ki mon ti ganny elekte.

E sa se pour annan bann dat *fix*, pour eleksyon dan nou pei Sesel.

**(APPLAUSE)**

**THE PRESIDENT WAVEL RAMKALAWAN**

Alor dan premye kar sa lannen, sa Lalwa pour lamannman Konstitisyon pour vin devan Lasanble. E mon kont lo zot pour mwan resevwar zot sipor, pour ki nou pei i kapab fer en lot pa.

E parmi sa bann lamannman letan nou pe regard dat *fix*, nou pour osi retir tou sa ki annan pour fer avek liminite ki en Prezidan i annan. Alor...

**(APPLAUSE)**

**THE PRESIDENT WAVEL RAMKALAWAN**

... nou pour, nou pour enn fwa pour tou retir sa trwa mo ki dir, "en Prezidan apre ki in kit lofis, dan sa premye 3 an ki ou ganny drwa anmenn en *case* kont li, e apre sa i fini".

Sa osi tou pour ale, e i pour osi retir sa Lartik ki donn

Prezidan sa posibilite pour li demisyonnen e deswit *call* en eleksyon, pour li kapab redebout, pour li tat delo parey nou dir.

Pour napa sa bann zafer tat delo. Si en Prezidan i demisyonnen, savedir i sorti e nouvo eleksyon i ava ganny fer.

**(APPLAUSE)**

**THE PRESIDENT WAVEL RAMKALAWAN**

E Mr Speaker, nou pour osi redefinir dan ki bann lenstans ki Vis-Prezidan i ava kontinyen manda ki en Prezidan i annan, apre ki'n ganny elekte. E kote ki nouvo eleksyon, i ava ganny fer. E parey mon'n dir tousala i ava devan zot, dan ankor enn pti git letan.

Mr Speaker, letan mon ti *Leader* Lopoziyon, mon ti anmenn en Mosyon devan sa Lasanble. E sa Mosyon sete pour etabli, *TRNUC*. En Komisyon ki ti pour rod laverite, rekonsilyasyon, linite Nasyonal pour nou pep.

Sa Lalwa ti ganny pase e Prezidan Faure ti *assent* avek sa Lalwa. Akoz Prezidan Faure avek mwan, nou ti annan menm fason panse, an sa ki konsern sa ki ti'n arive dan pei Sesel.

Sa Komisyon in fer son travay e sa Komisyon in donn mwan son rapor an Mars 2023.

Mr Speaker, ozordi solanelman devan Lepep Seselwa, parey ki rapor Komisyon *TRNUC* i demande, koman Sef Deta, mon anvi prezant avek tou viktim e avek tou Seselwa leskiz pei Sesel.

Mon anvi eksprim regre pour tou sa ki'n arive. Tou sa soufrans, ki nou pep in pas ladan pandan sa bann lannen nwanr.

E alor mon espere ki tou bann viktim, enkli ou Mr Speaker e tou bann lezot, zot ava aksepte ki poudir Leta Seselwa anba mon direksyon, nou pe dir, pardon pour sa ki'n arive. E annou bouz devan ver linite, ver rekonsilyasyon, e ver laverite toultan.

**(APPLAUSE)**

**THE PRESIDENT WAVEL RAMKALAWAN**

Mr Speaker, depi ki rapor in ganny met devan mwan. E ofet menm avan ki rapor in ganny mete, mon ti deza komans fer serten demars, pour nou kapab al ver sa rekonsilyasyon ki sa pep i bezwen.

E la nou dan sa moman kot nou'n fini fer lamannman dan *State Land and River*

*Reserves Act*. E alors sa program pour ki serten bann later ki pa'n ganny devlope, i kapab retourn pour zot bann propriyeter orizinel. Sa byento pour komanse akoz Lalwa in komans fer; in fini pase savedir.

I annan bokou bann lezot, eleman dan sa rapor ki byento nou pour met zot an aplikasyon. Me mon konnen osi ki poudir pli gro size ki bann viktim ki'n vin devan pe koz lo la, se sa size konpansasyon.

Mon anvi remersi Lasanble Nasyonal, pour sa deba ki zot ti fer lo rapor *TRNUC*. E mon anvi avek tout lonnekte, osi partaz bann dilenm ki zot ti pas ladan, letan zot ti pe regard sa size konpansasyon.

E mon anvi dir avek Lepep Seselwa, espesyalman bann viktim, ki sa i reste pli gro size, pli gro lobstak pour nou Nasyon, e pour Gouvernman *du jour*, sa Ladministrasyon pey okenn konpansasyon.

Sonm i enorm. E alor nou pour bezwen ansanm fer bann lezot rezonnman, lo ki mannyer nou pour kapab rekonpans bann viktim ki'n soufer. E nou tou nou'n ganny sans swiv bann deliberasyon Komisyon *TRNUC*.

E alor mon anvi ki Lepep Seselwa, i fer sa refleksyon, e

fer serten rekomandasyon. An se moman, nou annan bann lezot konpansasyon osi tou ki Gouvernman i bezwen peye.

I annan La Misère; i annan *PUC* Praslin; i annan tou sa bann konpansasyon *fungus*. E i annan lezot konpansasyon ki nou bezwen peye.

E ziska aprezan mon anvi dir Mr Speaker, ou konnen mon trouv mwan parfwa dan bann sityasyon vreman enteresan, parski *TRNUC*, mwan ki ti anmenn Mosyon pou ki nou kapab fer li. E ozordi mon trouv mwan pe demann pardon lo lapar Leta Seselwa.

Konpansasyon La Misère, mwan mon'n ed bann viktim lager pou zot konpansasyon. Ozordi se nou Ladministrasyon ki bezwen peye.

*PUC* Praslin se mwan e ansanm avek Mr Albert Philoe ti vin kot Lasanble Nasyonal pou lager pou zot. E ozordi se mwan Ladministrasyon menm, ki bezwen trouv larzan pou peye.

*Fungus* bann problemn depi \*Lasanble Nasyonal e tou, kot nou'n - Libreri Nasyonal, kot mwan mon'n parmi bann dimoun dan Lopozisyon ki'n lager pou bann dimoun ganny zot konpansasyon, ozordi mon trouv mwan koman sa enn ki bezwen fer sir ki zot ganny zot konpansasyon.

Alors vreman Mr Speaker, lavi i gou, lavi i enteresan, lavi i dou. E toulezour annou viv li avek bokou lapresyasyon. E annou konpran ki poudir, ozordi nou kapab dan en tel pozisyon, me demen nou kapab dan en lot pozisyon.

Me selman sa ki enportan se ki nou annan prensip. E ki pa aköz yer ou ti dan Lopozisyon, ozordi ou dan Gouvernman ki ou bliye, me ki ou kontinyen mazine.

An tou, depans ki Gouvernman in fer pou travay ki sa Komisyon in fer in kout Leta en sonm R54.1 milyon. E tou sa Seselwa i bezwen konnen.

Mr Speaker, letan nou pe regard leta nou pei e letan nou pe regard bann gran prensip. Me an menm tan osi letan nou pe regard nou pep an partikilye, mon krwar ki i enportan pou nou toultan gard nou ledwa lo pou sa pep.

E mon konnen ki poudir ozordi i enn bann size ki bokou dimoun i koz lo la, se size *welfare* e size *cost of living*. Parski Mr Speaker, en keksoz ki mon anvi fer kler, ki poudir Wavel Ramkalawan i en dimoun ki fofile. E mon koz avek tou dimoun, e mon konpran soufrans ki serten dimoun i pas ladan.

E se pou sa rezon ki letan nou komans, par egzantp avek sa size *welfare*, i enportan pou mwan dir avek Lepep Seselwa; in annan en kantite netwayaz ki nou'n bezwen fer. Aköz si i annan en landrwa kot in annan bokou koripsyon, bokou preferans e menm viktimizasyon, sete kot *welfare* i konsernen.

E ozordi nou'n kapab war en pli gran laklerte, e menm avan nou antre dan lannen eleksyon, Gouvernman e sa Ladministrasyon in deside pou li pran serten aksyon.

Zot ava mazine ki mannyer lo 2 repriz komansman lannen pase, e apre sa pli tar lannen pase nou ti anonse, e tousala in fini vin en realite - ki mannyer nou'n ogmant lakantite larzan ki bann dimoun ki dan bezwen zot resevwar.

E apartir Zanvye sa lannen, i annan 8 bann diferan benefis ki'n ogmante. E mon vreman apresye ki ASP in pran son letan, pou envit tou bann Manm Lasanble, e ozordi zot tou bann Manm Lasanble zot in ganny sa bon leksplikasyon lo egzaktaman ki sa bann benefis ki pe ogmante.

Ki benefis paternite, maternite, pou bann *semi-orphan*s, pou bann zanfan

abandonnen, oubyen bann orfelen, pou bann *foster children*, pou bann *foster parents* e menm *allowance* pou bann manman ki pe atann zot pti baba; spesyalman bann ki sorti Praslin avek La Digue, ki mannyer tousala in ogmante.

E Mr Speaker, logmantasyon ki'n pase i en logmantasyon ki son varyasyon i ant 81 pousan ziska 233 pousan. Se sa en Gouvernman, en Ladministrasyon ki regard son pep, ki santi soufrans son pep. E alors ki rantre pou ofer en solisyon.

E nou'n osi azout en nouvo benefis, e sa se pou bann paran pou bann manman, ki olye ganny zis en zanfana zot ganny plis ki en zanfana.

Zot osi nou pa'n bliy zot, akoz nou konnen ki poudir letan 2 zanfana, 2 pti baba i ne presyon i vin bokou plis.

Alor Mr Speaker, nou pe regarde ki mannyer nou pou pran pli gran swen avek nou pep. E an menm tan osi anba kot ASP, e bann Servis Sosyal zot in regarde ki mannyer letan en dimoun i dan bezwen i pou kapab resevwar sa lasistans dan en fason pli vit.

E nou pe koup bokou plis sa birokrasi ki ti neser dan en serten moman, pou nou kapab

net tou keksoz annord. E ozordi alor keksoz in pran en nouvo fason.

Mr Speaker, *Home Care* osi tou e anba sa nouvo *Home Care Agency* i a pe pran en nouvo lelan. E ozordi keksoz pe bouze. Me selman mon bezwen fer en lapel avek nou bann Seselwa. Nou bezwen fer en lapel pou nou kapab ganny pli bon *home carers*. Pou nou ganny bann dimoun ki pou pran pli gran responsabilite.

Paski ou kapab annan en *Home Care Agency*, me selman si ou napa sa *carer* pou ou donn sa dimoun ki dan bezwen. pou donn sa trwazyenm az. i vin vremen difisil.

E mon mazine ki se pou sa rezon, ki i annan bokou bann Seselwa ki pe plito rod fer vini en etranze pou pran swen avek zot vye manman, avek zot vye papa.

Donk Mr Speaker, alors mon fer en lapel avek Lepep Seselwa pou nou letan nou pe rantre ladan, letan *Home Care Agency* pou fer *training* pou ki nou kapab lev nivo, lev standar, pou vin devan pou nou kapab asiste.

Me an menm tan osi byensir nou war ki lo sa kote sosyal, nou kontinyen ganny plis problem. Nou kontinyen war i annan dimoun ki

*homeless* e bann dimoun ki bezwen al dan bann lenstitisyon.

Alors, la mon fer en lapel avek bann fanmir, pou nou kapab zet en pli bon lizye lo nou byenneme. E sa i ava fer ki dan konteks nou fanmir, nou ava kapab donn sa dimoun sa ki i bezwen.

E zisteman Mr Speaker, ankor enn fwa letan nou pe regard *cost of living*, malerezman *cost of living*, pri lavi i pa'n ogmant zis Sesel. E bokou bann Seselwa ki vwayaze letan zot al deor, ki zot al *Dubai*, ki zot al Sid Afrik, ki zot al Moris, sa bann pei kot Seselwa i frekant en pe plis, letan zot retournen zot dir avek ou, be i annan serten keksoz ki pli bon marse Sesel ki dan sa bann pei.

Menm Langleter, mon ti soke letan enn manm mon fanmir ti isi, ti annan serten keksoz ki i ti pe aste isi pou li anmenn avek li Langleter. Parski i dir Langleter i pli ser ki serten keksoz ki in nobou gannyen isi.

Donk, nou koman en Gouvernman, koman en Ladministrasyon, nou pe regard ankor rol ki *STC* i zwe.

E Minis Hassan e *Board STC* pe deza komans en konversasyon pou nou regarde ki mannyer nou pou kapab fer

desann pri tou komodite ki nou kapab. Ki i anviron sa 20 komodite debaz, ki i osi avek provizyon bann materyo konstriksyon. E dan tou lezot domenn kot *STC* i annan en rol pou zwe ozordi.

E mon espere, ki poudir pli tar sa lannen, mon sipoze komansman premye 6 mwan, nou ava kapab regarde ki mannyer sa bann komodite i ava kapab - pri i ava desann e nou popilasyon i ava kapab ganny en pli gran akse avek sa bann komodite. E zot larzan i ava kapab al - i ava kapab servi zot pou plis letan.

E la mon anvi fer en lapel avek sekter prive. Mon anvi dir avek sekter prive zwenn nou koman en Ladministrasyon dan sa demars pou nou fer pri lavi desann. Bann dan sekter prive ki enport bann komodite spesyalman bann komodite debaz, pa bezwen rod zis profi, me annou regarde osi ki mannyer nou kapab ed nou pep pou zot nobou pli byen konpran.

E an menm tan osi pou ki nou pep i kapab ganny en standar lavi ki al bokou pli o. Me Mr Speaker, nou kapab koz lo *welfare*, nou kapab koz lo pri lavi. Me i enportan pou nou ozordi e mon espere ki poudir pandan zot deba, zot ava kapab

met lanfaz lo lanplwa, pou dir avek dimoun ki tou keksoz i komans avek en lanplwa stab.

Ki avan ki nou mazin *welfare*, spesyalman letan nou ankor annan tous a lafors, annou mazin en ki mannyer nou pou kapab ganny en lanplwa. E ki sa lanplwa i a kapab anmenn nou ver semen stabilite e prosperite.

Tro bokou nou bann zenn ozordi zot pa dan lanplwa. Me si lakantite zenn ki pa dan lanplwa i anba 5 poursan nou popilasyon.

Me selman *still* 5 poursan, e 5 poursan i tro bokou. Alors, annou ankouraz nou bann zenn, pou zot al ver direksyon ki zot pou gannyen lanplwa kot zot pou konport zot.

E kot zot pou aplik zot, pou ki demen zot a kapab debout lo zot lipye e fer kontribisyon - kontribisyon dan Fon Pansyon. Kontribisyon pou zot kapab pli tar dan lavi zot osi tou ganny keksoz ki pli serye.

E donk la, mon osi anvi dir ki nou Departman Lanplwa, i pe toultan rod bann program pou zot kapab ed bann zenn ganny bann *skills*. E non selman sa, me nou pe osi kontinyen avek program lokalizasyon, kot plis Seselwa i kapab rantre dan bann landrwa travay,

spesyalman dan bann o pozisyon.

E la mon kontan ki poudir dan lendistri tourizm, nou'n war serten nou bann Seselwa ki'n nobou fer zot *training*. E ki ozordi zot pe zot dan bann pozisyon *management*. E se zot ki a pe diriz sa bann diferan lenstitisyon.

Alors, nou a pe kontinyen fer sa. E mwan sel keksoz ki mon pou dir avek Seselwa, loportinite i la, sezi loportinite e fer keksoz bouze.

E an menm tan osi parey nou pe dir, i annan bokou bann biznes ki pe rod travayer, e se la kot i annan plis dimoun ki pe rod *GOP* pou zot biznes.

Me nou Seselwa annou pran sa loportinite. Annou sezi sa bann loportinite. E annou fer ki sa larzan olye al dan bann pei deor, zot ava reste dan nou pei Sesel.

E donk, dan sa nivo lanplwa pli tar sa lannen, ankor enn fwa Lasanble Nasyonal, zot pe ganny demande pou zot fer zot analiz lo nouvo *Employment Act* e sa i ava fer ki nou ava regard lanplwa dan en nouvo fason.

Mr Speaker, nou tou dan pei nou anvi viv dan lape e an sekirite. E alor ozordi mon anvi komanse par dir avek Komisyoner Lapolis ki la

prezan, avek Brigadye Rosette, mersi bokou pou lafason ki zot ede gard nou pei dan lape ek sekirite.

Mon anvi kontinyen ankouraz nou bann zenn osi, pou zwenn Lafors Lapolis, pou zwenn Lafors Defans parski zot rol i tre enportan.

E la Mr Speaker, mon anvi dir ki an menm tan osi, byensir nou bezwen gard en nivo disiplin. E mon konnen ki poudir i annan bann lenstans kot bann keksoz pa'n mars byen.

Me la ankor enn fwa parey mon'n dir o komansman, ki dan lapolis, ki dan militer letan i annan bann aksyon ki al deor kontrol aksyon nesese i ganny pran.

Me selman mon anvi an menm tan osi dir ki dan sa lalit kont drog, mon anvi ki nou pa senpatiz avek bann trafikan, nou pa senpatiz avek bann ki fer dezord dan nou bann kominote.

E la mon anvi dir mersi osi tou bann zabitan Corgat Estate, ki tou dernyerman apre sa bann-sa bann legzersis, sa bann travay ki lapolis in fer avek militer, ozordi zot kominote i pli anpe. E zot kapab respir en pti git plis.

E mon kapab reasir zot, e reasir tou bann diferan

kominote, kot ozordi i annan dezord, ki poudir aksyon apropiye pou ganny pran e nou pou fer sir ki sa lalit kont drog i enn ki kontinyen.

Donk Mr Speaker, ozordi mon anvi fer kler. Nou Ladministrasyon e sa parti ki mon reprezante i kont drog.

Eski mon kapab fer menm lapel avek tou bann lezot parti politik dan sa pei, pou zot osi tou debout kler kont drog ki pe anvair e ravaz nou sosyete. Annou pa servi drog koman en eleman politik.

Mr Speaker, dan sa menm lespri, letan nou pe regarde ki mannyer nou pou kapab bouz devan, e ki mannyer nou pou ed nou pep ganny bann diferan fasilite.

Mon anvi anonse ki ozordi nou pe regard byen pre, nou bann Seselwa ki pe viv dan *diaspora* e ki byento servis Imigrasyon pou nobou ofer nou bann sitwayen, ki viv Langleter, *La France* ek *UAE*, zot servis zot *paspor* biometrik.

E anplis ki sa, byento ankor enn fwa dan pe fasilite tou sa bann keksoz, byento tou Seselwa pou kapab ganny zot Sertifika Nesans, Maryaz, Lanmor ek bann lezot atraver *computer*, *online*.

E tousala ankor enn fwa i ava fasilite keksoz pou bouz



devan. E en nouvo fasilite en dezyenm fasilite pou Seselwa ganny son *ID*, alors pou li kapab al travay, i ava kapab i ava ganny enstale. E alors plis dimoun i ava kapab bouz devan.

Mr Speaker, nou pei ozordi letan nou pe regard nou bann zenn e ler nou pe regard devlopman *sports*. I enportan pou nou ankor enn fwa fer en lapel, e parfwa mon vreman a triste letan mon war bann federasyon ek bann lasosyasyon pe pas dan bann difikilte.

E letan mon war ki se bann atlet ki soufer finalman. Me la mon avi dir, ou konnen parfwa ankor enn fwa dimoun i dir “be akoz Gouvernman pa entervenir?”

Non, kot *sports* i konsernen i kler. Gouvernman pa kapab entervenir. Mon konnen ki poudir par egzanp la, dan Federasyon Foutbol i annan diferan keksoz ki pe arive.

Me si Gouvernman i entervenir *FIFA* pou ban nou Lasosyasyon Foutbol pou partisip dan okenn konpetisyon. Si nou entervenir dan kwa ki pe pase dan *Basketball* ankor enn fwa menm problemn.

Alors, mon anvi fer en lapel Mr Speaker, avek sa bann federasyon e avek sa bann lasosyasyon, pou zot letan zot elekte zot bann *management*, elekte bann dimoun ki pou ede fer keksoz bouz devan.

Akoz letan zot pa fer sa se nou bann zenn ki soufer. E donk, annou pa les ou zenn soufer. Parski mwan mon anvi war plis zenn dan bann landrwa sportif; plis zenn pe devlope, plis zenn pe fer sikse.

E la ki lannen prosenn nou pou annan nou *CJSOI* ki pou organiz isi. E osi *World Cup Beach Soccer FIFA* ki pou fer isi, mon anvi ki plis nou bann zenn i trouv bann lankourazman.

E nou koman en Gouvernman ki nou kapab fer, nou kapab ede pou amelyor bann fasilite. La letan nou pe koze, mon anvi dir avek tou bann atlet, ki poudir *track* ki pou ganny mete otour Stad Linite in fini rantre dan pei. E ki boner Mars bann kontrakter Sinwan zot pou dan pei. E nou espere ki poudir sa lannen, *School Athletics* i ava ganny fer lo Stad Linite lo sa nouvo *track*.

**(APPLAUSE)**

**THE PRESIDENT WAVEL  
RAMKALAWAN**

Me mon osi anvi dir ki i annan bann diferan fasilite ki'n osi ganny renove tel ki Palais de Sport, *Tennis Courts* e bokou bann lezot ankor. Donk, mon anvi zot koman bann Manm Lasanble, mon anvi dir zot organiz plis bann aktivite. Ladministrasyon pou ankouraz zot, Ladministrasyon pou siport zot.

E alors dan *weekend*, espesyalman dan Dimans anmenn nou bann zenn partisip dan foutbol, dan *volleyball*, dan tou sa bann diferan *sports*. Ede pou retir nou bann zenn dan sa bann move lenfliyans.

E mon kontan, e mon felisit *SNYC* ki'n pran en nouvo lelan, ki zot pe ankouraz bann zenn ki i konsern lanmizik, ki i konsern lar, ki i konsern tou kalite, ki anmenn sa lespri pozitivite.

E alors si nou osi tou koman en Lasanble Nasyonal, e si Lepep Seselwa tou bann federasyon, tou bann lasosyasyon, nou kapab anmenn sa lespri pozitivite. Ankor enn fwa mon dir, ki napa naryen ki pou bar nou koman en pei.

E si i anplis ki sa met dan lafanmir, e donn lafanmir plis a lankourazman, ankor enn fwa

nou ava kapab redwir vyolans domestik.

Sa bann *challenges* ki nou bann fanmir pe fer fas avek, i ava kapab redwir. Nou ava trouv plis prevansyon sa bann aksidan. Nou ava kapab edik nou fanmir. E anplis ki sa nou ava kapab *buildup* nou fanmir.

Pou ki i ava annan pli gran lentere dan kwa ki nou zanfan i al fer lekol. E ki mannyer nou pou kapab donn nou zanfan sa lankourazman nesese.

Mr Speaker, dan sa menm lespri lannen 2024. E lannen 2024 pou vin en lannen, kot ankor enn fwa sa Ladministrasyon pou servi sa larzan ki Lepep Seselwa i kontribye atraver taks e atraver bann lezot fason, pou nou kapab fer bann lezot proze; bann proze ki pou benefisye Lepep Seselwa.

Parmi bann proze mazer ki nou espere komanse e menm terminen sa lannen. I annan byensir pou pran plis letan. Nou annan Por Victorya kot nou pe reabilit li, e osi *extend* son lasose par 300 met.

Proze nouvo *airport* Sesel ki plan sa *master plan* pe ganny prepare i lo bann dernyen staz preparasyon. Proze *West Coast Road* ki sa semenn nou'n ganny sans pou nou ganny en lot apersi ankor.

E la mon zwenn Minis pou remersye premyerman tou bann dimoun ki'n donn en morso zot later. Wi, tou sa bann dimoun Sesel i dir mersi bokou. Me la aprezan nou fer lapel avek bann dimoun ki ankor ezite pou donn en bout later, silvouple mazin Sesel. Pa zis mazin ki poudir kwa ki zot, zot pou gannyen.

Mazin apre tou lanbilans pou pas lo la; *Fire Brigade* pou pas lo la, bann servis esansyel pou pas lo la. E anplis ki sa ou menm ou, ou pou gannyen semen ki bokou pli konfortab.

Lo Praslin byensir byento la nouvo *Vehicle Testing Station* i ava konplete. E sa i ava fer ki standar sekirite i ava pli o. Bann proze lakaz ki nou pe kontinyen met lanfaz lo la. Proze lakaz ki demann nou plis finansman e ki nou pe kontinyen rode.

I annan bokou proze ki pou komanse sa lannen, e letan nou ariv Zen, si nou kapab met plis larzan ankor dan konstriksyon lakaz nou pou fer li.

Lekol Larozyer trwazyenm term, premye parti i ava'n terminen. E nouvo blok i ava komans konstri an Zen sa lannen.

*Drugs Rehabilitation Center* sa lannen ankor.

*Remand Center* i terminen sa lannen.

*Maximum Security Prison* in fini komanse.

*SRC House, Carnegie Building, Independence House Renovation.*

Lekol Lagrikiltir, ankor enn fwa byento la bann zenn i ava kapab rantre dan zot nouvo lekou.

Sant Kominoter Perseverans an Mars la i ava al lo *tender*. E apre i ava komanse egzaktaman parey Sant Kominoter Cascade.

Les Mamelles *Day Care* sa lannen menm,

Stasyon Lapolis Perseverance,

*Coast Guard Jetty, Regatta Site Development, Victoria Waterfront, Ile Du Port Infrastructure.*

I annan en kantite sa bann proze ki mon espere nou pa ganny okenn retar.

E tousala Mr Speaker, se pou nou fer lavi nou pep vin pli konfortab. E alor mon demande ki, mon demande ki dan milye tousala, Lepep Seselwa nou osi zwe nou rol. Annou pa detri sa bann lenfrastruktir. Akoz apre tou se nou ki servi sa bann

lenfrastruktir. E annou servi zot byen.

E la mon anvi dir avek Onorab Adelaide, ozordi kontra in sinyen pou nouvo Klinik Baie Lazare. E alors apartir sa semenn kontrakter pou lo site e ou ava kapab debourye.

**(APPLAUSE)**

**THE PRESIDENT WAVEL RAMKALAWAN**

Mr Speaker, letan nou osi koz lo bann proze distrik, i annan bokou sa bann proze ki nou pe met devan pou nou fasilite lavi nou pep. Ki bann pti semen, ki plis lalimyer, ki bann peron ki pe larzi bann semen. Praslin apre 57 an *Adam Estate* ozordi i annan li en semen koltar.

E i annan plis travay ki pe ganny fer lo Praslin e lo La Digue. E dan tou bann distrik isi lo Mahe, kot nou pase nou war keksoz pe bouze.

Letan mon sorti dan lakour, Semen Serret pou desann, mon war ki finalman bann zabitan St Louis ki desann Biznak, zot pa a bezwen demann pardon transpor. Me ki zot ava annan zot prop *pavement*.

Alors, pou annan plis Bidze ki pou ganny mete, in fini ganny mete pou ki bann pti proze dan bann distrik, par

egzanp koup bann pye danzere, bann pye dibwa danzere ek bann lezot pti proze i ava kapab ganny fer.

An 2023, nou'n fer 151 pti proze pou en valer R19,000.06 milyon. An 2024, nou'n ogmant sa Bidze pou li vin 26 milyon.

E nou espere fer 240 bann pti proze. E anplis ki sa pou annan R10 milyon parey Minis ti anonse, ki pou ganny mete pou nou fer plis bann pti semen.

Alor Mr Speaker, tousala i montre poudir sa Ladministrasyon i enterese avek son pep. E si nou pe kapab fer tou sa bann keksoz, se parski larzan ki rantre dan Kof Leta, nou fer sir ki i ganny depanse byen.

Ki poudir nou'n elimin koripsyon, e ki sa pep Seselwa i kapab byen servi sa larzan ki in kontribye. E se sa ki pou fer nou kapab ed plis nou pep.

E mon ganny plizyer let bann dimoun ki bann dimoun Salazi Praslin - Chantal avek son garson pe pas dan difikilte. Ki i bann lezot dimoun dan bann lezot distrik.

Alors, mon anvi dir avek Lepep Seselwa, sa Ladministrasyon e mon Gouvernman nou pou kontinyen travay pou nou kapab soulaz zot. Me selman si

letan nou met lalimyer Perseverance, apre aswar bann zanfan i ale i kas lalimyer, nou a pe detri sa kominote.

Alors, annou toultan pran sa an konsiderasyon. E se la osi Mr Speaker, parey mon'n dir kot nou anvi konstri maksimonm kantite lakaz posib.

E mon konnen ki poudir Minis Rangasamy, i anvi war tou sa bann diferan lakaz ganny konstri. Pou ki sa lalis i a kapab redwir e ki dimoun i kapab *build up* zot fanmir dan en fason byen. Elve zot byen.

E dan milye tou sa bann plan byensir, finansman. E parey mon'n dir, nou pe koz avek diferan sours finansman pou nou kapab fer keksoz avanse. E an 2023, nou'n vremen travay dir pou nou fer sir ki maksimonm dimoun i kapab ganny en kare later.

E la byento dan distrik Anse Royale, pou annan en nouvo *land bank*. Travay in fini demare e ki alors nou ava kapab, nou ava kapab ganny sa nouvo *land bank*, kot ankor enn fwa plis fanmir Seselwa i ava kapab ganny en kare later.

Bann dimoun ki mon ti anonse isi menm, bann dimoun ki war en bout kare later o bor ki pou Gouvernman o bor kot zot paran i reste.

Mr Speaker, an 2023 se sanmenm sa lannen ki nou'n donn plis dimoun, sa bann pti bout later. Sa bann pti bout later 200 met kare, 300 met kare, 400 met kot zot in kapab aprezan konstri zot lakaz. E bann ki'n kapab fer zot plan. Alors nou pe kontinyen.

E anplis ki sa Mr Speaker, kot *Planning* i annan sa bon korperasyon. E la mon felisit Lotorite *Planning*, i annan sa bon korperasyon pou nou regarde ki mannyer nou kapab *fast track* bokou sa bann pti, pti proze pou nou bann dimoun.

Me selman la ankor enn fwa, mon anvi demann, mon anvi fer en lapel avek bann diferan lazans, silvouple letan plan i vin kot zot, e zot ganny 14 zour pou zot regard sa plan, pou zot anvoy zot komanter. Silvouple fer li, fer li pa bezwen met sa proze sa plan dan en tirwar kot lapousyer i akimile. E apre sa, *MNA* i bezwen fer lapel, lot dimoun i bezwen fer lapel - let i bezwen vin kot mwan.

Annou fer sa, e si nou fer sa nou ava kapab fer plis sa bann lakaz posib. Mr Speaker, mon bezwen dir ki e se pou sa rezon ki mon'n dir annou koz laverite. Si nou kapab koz laverite avek sa pep, nou pep pou regard keksoz diferaman. E

nou pep pa pou rantre dan sa fristrasyon ki i santi parfwa.

E la par egzantp mon anvi dir nou lekonomi parski tou sa bann keksoz ki nou pe koz lo la, i depan lo nou lekonomi. E letan nou lekonomi pa bon, byensir nou pa pou kapab akonpli sa bann diferan keksoz.

An 2023, nou'n war ki poudir nou lekonomi in grandir par 3.3 poursan. E tandis ki nou ti pe mazinen ki 2023 nou Bidze nou pou fini avek en defisit. E Mr Speaker, mon anvi dir ki ofet nou'n sorti avek en sirplis R487.8 milyon ki reprezant 1.7 poursan *GDP*.

Det Gouvernman ankor enn fwa pou montre ki mannyer nou serye - det Gouvernman in redwir an 2023, in sorti 64.6 poursan Desanm 2022, pou li vin 60 poursan. Alors, nou a pe kontinyen debourye menm. E lo *Fitch Ratings* ozordi Sesel son *rating* i *BB* e avek en *Stable Outlook*.

Savedir, bann fo profet pe zis senm konfizyon. Lekonomi nou a pe fer tou sa ki nou kapab, pou nou fer li grandi. E Mr Speaker, mon ava montre ou ankor ki mannyer parfwa dimoun i koze e bann lenformasyon i fo.

An 2022, nou ti ganny nou 332 mil 68 viziter touris dan nou pei.

An 2023, nou'n ganny nou 350 mil 869 savedir 18 mil 811 viziter anplis. Ki reprezant en logmantasyon 6 poursan.

Me ki nou'n antann? Nou'n antann dimoun pe dir *tourism* pe mal fer, touris pa pe vin Sesel. Me selman nou'n nobou ganny 350 mil ki'n depas sa ki nou ti'n fer prozeksyon par 6poursan! E la Mr Speaker, mon'n ankor enn fwa tande ki poudir touris pa pe fer byen.

Me mon ava dir ou Mr Speaker, larealite. Larealite se ki le 11 Fevriye 2024, in annan 40 mil 422 viziter ki'n antre dan pei. E letan ou konpar le 11 Fevriye 2023, sa i reprezant en logmantasyon 14poursan. Eski touris pa pe vini? En logmantasyon 17poursan touris pa pe vini, nou pe mal fer?

Me mwan mon ti ava dir olye ki nou fer sa bann deklarasyon, annou rode ki mannyer nou pou ankouraz plis touris pou vin isi. E la mon anvi dir ki sa lannen i annan bann negosyasyon ki pe ganny fer. I pou annan plis bann *airlines* ki pou fer bann vol direk ki pou rantre Sesel. Alors, mon anvi donn sa lankourazman.

E ki nou'n osi war? Nou'n war Mr Speaker, ki *Waldorf of Astoria Hilton Hotel* lo *Platte Island* en lotel 7 zetwal in fini

ouver sa lannen - *Cheval Blanc* - en lotel 7 zetwal ki definitivman pa pou anvi en lanmar polye dan son *backyard*.

I pe al ouver.

*Avani* pe al ouver,

*Canopy* pe al ouver.

Travay pe ganny fer lo *Fregate Island Resort*.

*Reef Hotel* tou bann travay pe ganny fer, pou li kapab demare. *Fisherman's Cove Hotel* pe al pas dan en renovasyon total. E nou kontinyen donn zot lankourazman. Lotel lo Lasonpsyon ek *Silhouette* i dan bann leta planifikasyon.

E alor Mr Speaker, zot be tou sa ki nou pe fer, eski sa pa apel devlopman pou nou pti pei Sesel?

Si sa pa apel devlopman ki manner nou pou apel li? Si sa pa apel nou a pe rod en fason pou nou fer nou lekonomi grandi, pou nou kapab met plis, pou amelyor lavi nou pep, ki manner nou pou apel li?

Me nou Mr Speaker, nou en Ladministrasyon ki pou kontinyen konsantre. I en Ladministrasyon ki pou kontinyen devoue. Malgre ki tanzantan nou ganny bann dekourazman. Me nou, dekourazman i flote lo nou. Delo lo fey sonz!

**(APPLAUSE)**

**THE PRESIDENT WAVEL RAMKALAWAN**

Mr Speaker, wi Ledikasyon i reste en *challenge* pou nou. I reste en *challenge*, aköz nou a pe rod tou fason pou nou donn nou bann zenn sa bon komansman dan lavi. Me parfwa pa zis lekol ki annan sa responsabilite.

Lekol i ranmas sa ki sorti dan lakour, e alors si dan lakour keksoz pa bon; Si dan lakour nou pa pe donn nou zenn sa lankourazman, letan i vin lekol i pa vin sa prodwir ki nou ti ava kontan i ete. O kontrè, i ede pou li detri bann lezot zanfàn.

Alors, ankor enn fwa mon fer en lapel avek tou bann paran. Parey mon bon zanmi Gramps Morgan ti dir "*if you cannot care for the ladies, you will never care for the babies*".

Alors letan nou pe met bann babies o monn, annou *take care of the ladies*. Me osi annou *take care* pou fer sir ki sa bann *babies* la, zot grandi pou vin bann zanfàn ki ganny bon swen, ki ganny bon latansyon e ki kapab delivre.

E donk Mr Speaker, an menm tan nou bezwen kontinyen ankouraz nou bann *teachers*. Parski i annan bokou

dekourazman, e *teachers* se bann imen zot osi. E alors annou kontinyen ankouraz nou bann *teachers*.

E atraver lankourazman nou bann *teachers*, pou nou fer sa landrwa lekol vin en landrwa bokou pli bon, pli pozitiv, nou ava kapab osi ganny plis Seselwa ki ava pare letan zot fini zot S5 pou zot rantre dans a profesyon *teaching*.

Donk, annou fer sa, parski sa lannen nou'n ankor enn fwa dekouver ki i annan mwens zanfan ki enterese pou li al dan *teaching*. E an menm tan osi, letan nou ava ganny plis nou bann ansenyan Seselwa, nou ava kapab ganny plis bann zanfan ki aplik zot lekor, nou ava kapab pe kree bann Seselwa kalifye pou nou pei. Pou nou pa bezwen toultan pe rod bann etranze pou vin travay kot nou.

Me an menm tan osi, nou pe kontinyen met lanfaz lo programm vokasyonnel. Me nou anvi met plis lanfaz osi tou lo disiplin. E ankor enn fwa mon fer lapel ek kominote. E la mon anvi dir letan nou war bann zanfan pe lager, toultan zanfan pou lager.

Me selman letan nou war bann zanfan in antre dan en konfli, mon demande be annou aret fer *film*! Annou aret fer

*video*! Annou entervenir pou nou anpes zot! Annou pran nou responsabilite koman adilt.

E parfwa dan sa bann *video* ki pa gou ditou - nou war bann adilt pe debout pa pe fer naryen. Alors bann adilt sak fwa ki zot trouv okenn konfli, pran sa zanfan koman ou zanfan, e alors anpes sa bann lager.

E Mr Speaker, wi nou pou kontinyen avek programm *breakfast* ek *lunch*, pou nou asire ki tou nou zanfan lestoman i plen. Ki poudir napa personn ki al dan laklas bomaten lo en lestoman vid, pou li pa kapab konsantre.

Nou pou kontinyen osi dan nou bann lekol pou nou anmenn sa lalit kont obesite. E sa i ava donn nou bann zanfan plis posibilite lo bann zafer *sports*. E an menm tan osi, nou konnen ki poudir zot ava kapab konsantre pli byen.

E la Mr Speaker, mon anvi osi dir ki lakantite *scholarships* ki nou'n kapab donn nou bann zenn;

An 2022 nou'n donn 209.

An 2023 nou'n donn 229.

E an 2023 nou'n depans en sonm R192 milyon pour nou bann zanfan ki aletranz pe etidye.

Alors, nou osi war ki lakantite zanfan ki pe ganny



admet dan bann lekol pos-segonder, sa osi tou i annan en serten lankourazman. E nou kontinyen demande ki sa lankourazman i ganny apiye avek sipor kominote.

Lasante li osi tou i en *challenge*. Nou tou nou konnen, Lasante i en *challenge*. Pandan bokou lannen in en *challenge*. E ozordi, nou a pe sey fer tou pour nou kapab kontinyen aranze.

Me selman parfwa ou a krwar letan ou aranz en bout, en lot bout i kase. Letan ou donn lankourazman en kote, i annan bann lezot ki fer lezot keksoz.

Alor mon anvi dir avek Lepep Seselwa, wi, ozordi ou kapab asire ki poudir Minister Lasante, tou son travayer, malgre lensilt ki zot gannyen, malgre bann parol dekourazman, zot debout for. E mwan mon debout lo zot kote ansanm avek Minis Peggy Vidot. Mon debout lo zot kote pou mwan dir avek bann travayer Lasante; nou pou kontinyen apiy zot!

**(APPLAUSE)**

**THE PRESIDENT WAVEL RAMKALAWAN**

Mon anvi dir ki nou pou kontinyen asire ki servis i

ganny delivre, e ki bann kondisyon i sanze li menm.

E la mon anvi profite an menm tan osi, pou mwan dir avek bann *cleaners* ki avek sa sanzman i ti annan en pe boulders. Mon anvi dir avek zot; pa bezwen trakase. I en ladministrasyon ki ekoute. Nou'n antann sa ki zot in dir.

E yer dan *Cabinet* nou'n diskit zot size. E sa semenn ki vini la, nou pe fer tou bann neser, pour zot kapab ganny rekonpanse dan en fason pli apropiye. Alor, kontinyen vin travay e donn sa pli bon servis posib.

**(APPLAUSE)**

**THE PRESIDENT WAVEL RAMKALAWAN**

E zisteman Mr Speaker, dan sa ki konsern Lasante, nou'n fini lans proze pou fer nouvo Lopital Sesel. E pli boner an Zanvye, sa delegasyon teknik ti ganny sans pou al vizit serten Lopital *Indonésie*.

E nou pe travay lo sa plan. E ki letan sa plan i ava'n fini ganny travay lo la, nou ava prezant li avek Lasanble Nasyonal e avek Lepep Seselwa, pou zot kapab war ki mannyer sa lopital pou ete.

An menm tan osi, mon anvi dir mersi sa komite

*fundraising* ki'n ganny etabli, pour travay ki zot pe fer. E la mon anvi ankor enn fwa envit tou Seselw. Sa lopital i pou nou lopital.

E alors, si zot konman bann MNAs, si Lepep Seselwa an zeneral, bann diferan lorganizasyon, ti ava kapab pran li konman zot responsabilite pou zot fer en pe *fundraising*, e apre pas avek sa komite, ki nou ti ava kapab ranmas *maximum* larzan, pou nou kapab fer sa nouvo lopital.

Espesyalman la ki nou dan sa lannen, kot Lopital Sesel i selebre son 100enm laniverser an Novanm. Ti pou gou, ti pou byen si nou ti kapab an Novanm, menm dan en fason senbolik, met sa premye pyer pour sa nouvo lopital. Ki nou espere i ava kapab anmenn nou pour sa prosen 100 an pour bann zenerasyon ki pou swiv.

Mr Speaker, byensir letan nou koz lekonomi, letan nou koz biznes, nou pe koz lo lendistri. E mon'n vreman kontan yer swar letan mon pe regard nouvel, mon war CEPS - Mr Alvin Laurence ki'n vin koze lo kwa ki zot ekspekte.

Mon'n kouver plizyer zot bann lekspektasyon konman CEPS. E mon kontan. Mon kontan. E sa i al ankor enn fwa dan laliny laliberte lekspresyon.

Lontan kote ou ti pou ganny en *Chairman CEPS* ki ti pou dir avek Prezidan ki pou mete dan son diskour?

Wi, sa *size ease of doing business*, i enn ki nou pran li aker. E la mon anvi asir tou dimoun ki i annan en kantite travay ki pe ganny fer. E nou a pe sey sanz sa kiltir ki egziste ozordi. E sa kiltir ki nou pe sey sanze se pou nou kapab ganny dimoun.

E atraver *digitalization*, pou nou kapab ganny dimoun, pou kapab fer zot bann aplikasyon sa ki ou bezwen al devan en dimoun. E ki keksoz i ava bouz pli vit. Nou anvi retir kontrol e vin sa bann fasiliter.

E la byento i pou annan sa *Investment Portal*, e en lot proze *Government Accelerator* ki nou pou met an plas. E ankor enn fwa tousala i ava ede pou ki *ease of doing business* i ava en fasilite apropiye. E ki nou bann *businessmen* i ava kapab bouze.

E nou'n war osi ki mannyer ankor enn fwa, apre tou sa bann lannen kot konblaz i ete, se *maintenant* ki semen i ganny koltare lo *Zone 6*, 19 ek 20 - plis ki 10 an! E se nou ki bezwen fer li konman sa Ladministrasyon.

E parfwa letan dimoun i koze, ou a krwar se nou ki pa'n

fer pandan 10 an pase. E ki ou a fer, nou kontinyen fer li.

Lo *Ile Eve* nou war ki poudir devlopman finalman pe konmanse, apre tou sa bann koze. E la ozordi nou annan sa premye *batch* dimoun ki'n fini soumet zot plan. E i annan serten ki konstriksyon in fini konmanse.

*Regatta Site* parey nou'n dir, demen nou ava al regarde konsernan sa bann pye dibwa e parski nou pare pour nou konmanse, e pou nou donn nou bann viziter e nou bann lokal en nouvo sant latraksyon.

*Waterfront Development*; La ankor enn fwa yer dan *Cabinet* nou'n fini pran desizyon. Bann ki'n ganny *awarded*, zot pou kapab konmans zot proze. Alors, avan sa lannen i fini, nou pou konmans war keksoz ki pe arive lo sa *Waterfront Project*.

Kato Nwar Praslin, sa osi tou alokasyon in fini ganny fer. I annan bann plan ki'n ganny soumet kot *Planning*. E alors letan nou pou rantre pour nou al lo Lasose Baie Ste Anne, nou pou war en nouvo – en nouvo laparans. E sa i ava vreman vin sa sant komersyal lo Baie Ste Anne.

E lo kote Cote D'Or ankor enn fwa, kot i annan 4 kare later ki atraver *tender* bann

dimoun in gannyen pour zot kapab fer bann proze touristik.

Mr Speaker, travay i bokou. Parey mon dir, i annan bokou pou fer, me selman travay pa fer nou per. O kontrer, travay i donn nou lankourazman. Akoz nou letan nou'n vin prezant nou programm avek Lepep Seselwa pour eleksyon 2020, nou ti dir avek zot nou pe vin travay. E se sa egzakteman ki nou pe fer!

**(APPLAUSE)**

**THE PRESIDENT WAVEL RAMKALAWAN**

E Mr Speaker, lo kote Lagrikiltir, nou'n nobou *sort out* sa zafer – sa problemm *animal feed*. Ozordi i en size lepase. E mon kontan war ki mannyer bann diferan fermye, letan sa problemm in leve, letan Gouvernman in bezwen entervenir. Me ki mannyer apre sa, i annan bokou bann fermye zot in pran sa linisyativ lo li menm.

E se sa enn bann mo kle dan nou ladministrasyon; pran linisyativ debout, debourye. E nou, nou pou donn ou lankourazman! Alor, nou espere ki poudir tou sa bann *issues* i ava disparet, e ki nou ava kapab bouz pli devan.

Me zis avek sa gratwite ensidswit ki ti annan lo *animal feed*, sa in fer ki lagrikiltir in kapab lans li dan bann lezot proze. E la par egzanp i annan 4 nouvo proze ki zot pe fer.

La Digue pou annan en La Digue *Farmers Market*. Pou annan en Marse Anse Boileau. La Retraite nou pe al fer en lot. E Bazar Victoria, *Sir Selwyn Selwyn-Clarke*, li osi tou in kapab pas dan sa renovasyon.

Nou'n kapab – nou pe osi fer tou bann plan pou met bann lekipman apropiye dan laboratwar Praslin, e konstrir sa nouvo laboratwar Providence byento. E an plis ki sa, nou'n kapab osi met a dispozisyon bann fermye. Bann pti, pti lenfrastriktir.

Donk Mr Speaker, nou anvi osi rekonnet ki poudir atraver sa mouvman ki pe arive, i annan plis – i annan en pli gran lentere par bann dimoun dan sekter prive pou nobou rantre dan sa domenn.

Me zisteman, letan nou pe koz lo la, nou bezwen osi toultan pe mazin nou lanvironnman. Seselwa, nou bezwen gard nou pei prop. Nou bezwen en lanvironnman ki kot nou, nou pran nou responsabilite.

E ozordi mon anvi dir avek zot, par lefe ki bokou dimoun pa

pran zot responsabilite e zot zet salte partou, sa pe anmenn en kou adisyonnèl pour *LWMA* ek bann lezot lazans. Parske i annan plis salte ki an deor ki zot bezwen al ranmase.

Depi mon premye diskour ki mon ti fer isi, mon ti lans en lapel avek Seselwa pou nou gard nou pei prop. Pou nou fer ki lapropte i vin enn sa kalite ki nou bann ansyen ti kit avek nou. E ki ozordi an 2024 nou fer li vin ankor enn fwa nou tradisyon.

Mr Speaker, nou annan bokou travay pou fer lo kote lanvironnman. I annan bann proze; par egzanp Beau Vallon nou'n bezwen fer en *seawall* ki ozordi tou dimoun i apresye en kantite. Nou'n bezwen fer en lot *seawall* Anse Gaulettes, Ros Korbizo, Amitie.

Nou pe fer en travay la pour nou ranforsi, pour nou anpes sa lerozyon. E deza la zis sa pti travay ki nou'n fer in fer ki avek sa bann o mare, ek bann gran mare ki nou'n gannyen, napa en gren disab ki'n vin lo semen. E nou'n kapab protez semen.

Anse Marie Louise, sa proze i kontinyen. E byensir nou bezwen osi al Anse La Blague, al Pasquère. Nou bezwen desann Au Cap. Nou bezwen regard tou sa bann

landrwa kot ozordi - La Digue, Anse Severe, Anse Source d'Argent. Tousala se bann proze ki nou pou bezwen fer.

E la mon anvi dir avek zot, pa oubliye ki poudir avek sa bann sanzman klimatik, nou bann zil osi tou i kontinyen ganny afekte.

E tou dernyerman nou'n ganny bann portre ki mannyer nou bann koray - Alphonse – ki mannyer bann koray pe ganny detri. *Bleaching of corals* i lo en poursantaz vreman o. E tousala bann keksoz ki pou afekte nou.

Mr Speaker, lapes i enn bann size tre enportan pour nou. E nou bezwen rod tou fason pour nou konsolid bann Sekter Lapes. E enn bann keksoz ki sa Ladministrasyon in fer se pour li regarde ki mannyer i pou kapab amelyor bann servis ek bann fasilite pour nou bann peser.

Nou'n ouver bann por lapes. Nou'n konstrir bann store. E sa semenn dan distrik Glacis, nou'n war Minis Dezinyen - Minis Ferrari avek Onorab Regina pe met nouvo pyer pour en *gear store*.

E mon kontan mesaz ki Lasosyasyon Peser Glacis ti *envoyer* pou dir ek ban dimoun; nou pe ganny sa fasilite, annou servi li byen. Sa i en mesaz pozitiv ki nou bezwen propaze.

E mon konnen ki poudir Praslin kot zot in ganny – Grand Anse, kot zot in ganny zot *gear store*, zot pe debourye. E tousala ankor enn fwa, i anmenn sa bann bon fasilite pour nou peser.

E, la nou annan nou bann lezot keksoz ki pou ganny konstrir. Anse Etoile i annan proze. English River i annan proze. Anse à la Mouche i annan proze. E sa lannen Anse Aux Pin – dan distrik Anse Aux Pin, nou pou ouver fasilite pli gran pour lapes dan nou pei, depi ki sa Ladministrasyon i la.

E an menm tan osi, nou pe regarde ki mannyer lo *Zone 14* nou pou kapab elarzi sa biznes *Fish Processing* pour li vin en *Fish Processing Zone*, kot nou ava kapab fer valer azoute. E nou ava kapab osi annan fasilite pou repar bann bato lapes endistriyel.

*Aquaculture Development* ki ankor enn fwa, tousala se bann keksoz ki nou pe bouze. Me an menm tan ki nou fer sa, i enportan pour nou rode ki mannyer, nou pou fer sir ki nou stok pwason i ganny byen prezerve.

Parey zot in war, nou'n met serten *limit* lo – *limit* 30 santimet lo bourzwa avek lo zob. Me nou pou bezwen al pli lwen. Mon konnen ki poudir i

annan gran diskisyon ki pe ganny fer, an relasyon avek proteksyon nou stok zourit.

E tousala mon bann zanmi, annou pa regard li zis konman negativ. Annou regard li konman bann desizyon ki nou pe pran, pou nou asire ki demen, apredmen, nou zanfan nou pti zanfan i ava konnen ki savedir en bourzwa.

I ava konnen ki savedir manz zob. I ava konnen ki savedir manz en bon kari zourit - en zourit Sesel.

E an menm tan osi byensir, nou pe fer sir ki nou lager kot lapas ilegal. E la mon anvi felisit nou *Coast Guards*. Parske zis pandan sa bann dernyen semenn parey mon ti anonse, nou'n nobou atrap bann Bato Lapes Malgas, *Sri Lankan* e osi *Comorien*.

E tousala - e mon kontan pou war la ki poudir i annan sa pli gran korperasyon, e ki keksoz pe vreman bouze.

Donk, annou kontinyen protez sa lendistri pour ki nou bann *stevedores* e bann biznes Seselwa i ava kapab kontinyen prospere.

Mr Speaker, le 7 Desanm i pou reste marke dan listwar nou pei Sesel. Akoz le 7 Desanm, sete enn bann pli gran katastrof ki'n arive dan nou pei. Ki dan nor avek Lanvironnman;

ki dan les avek leksplozyon *CCCL*.

Depi ki sa Ladministrasyon in vin dan lofis, Sesel in eksperyans 2 pli gran katastrof; *COVID* avek le 7 Desanm.

E Mr Speaker, mon anvi dir ki mon debout isi la devan zot avek gran lafyerte. Parske avek tou lede katastrof, sa Ladministrasyon in montre ki poudir nou kapab pran aksyon e nou kapab bouze pou nou remet nou pei lo bon semen.

**(APPLAUSE)**

**THE PRESIDENT WAVEL RAMKALAWAN**

Nou'n kapab atraver *COVID*, refer nou lekonomi ki ti'n ganny bate. Re ouver *port* e re bouz devan. La avek sa lot kalamite, nou'n kapab ankor enn fwa; kot in annan lanmor, kot in annan bokou destriksyon – nou'n kapab zwenn ansanm.

E sa Ladministrasyon parey mon'n dir o konmansman, i en Ladministrasyon ki pa regard ou kouler politik, ou larelizyon, ou kouler lapo. Letan nou rantre pour nou donn led, nou donn led tou dimoun!

**(APPLAUSE)**

**THE PRESIDENT WAVEL  
RAMKALAWAN**

E Mr Speaker, letan nou donn led, nou pa rod *camera* pou vin tir nou portre.

**(APPLAUSE)**

**THE PRESIDENT WAVEL  
RAMKALAWAN**

Souvan – souvan mazorite travay ki nou fer, nou fer li san ki dimoun i konnen. San ki nou pas lo televizyon. Alors mon anv i ozordi, remersye Lepep Seselwa pour sa solidarite ki zot in eksprimen ankor, le 7 Desanm parey zot ti fer li pour *COVID*.

In annan en lespri ekstraordiner. E mwan mon'n senpleman santi mwan ganny plis lafors, par lafason ki zot in azir. E mon kapab demande ki sa menm lespri i kontinyen renye dan nou pei Sesel.

Dimoun sorti partou kote in vini pou donn koudmen. E ozordi nou pe kontinyen eksperyans sa solidarite.

E la mon anv i dir e mon kontan pou war mon frer *Enos Apostolic* isi pe ekout nou diskour. Pou mwan dir avek Monsenyer ki mon ti vreman touse dan lafason ki Imakile Konsepsyon pour Nwel, zot ti prezant en lakres an solidarite avek bann viktim Cascade.

**(APPLAUSE)**

**THE PRESIDENT WAVEL  
RAMKALAWAN**

Kot zot ti fer en Lakres ki ti napa en *roof*. En lakres ki ti annan vit dan manzwar kot zot ti'n met *L'Enfant Zezi*. E sa ankor enn fwa ti en senbol en lot solidarite.

E la Mr Speaker, mon anv i dir ki tou bann fanmir - parey ti ganny anonse, tou bann fanmir in ganny asiste avek R25 mil. E R25 mil son total tou dimoun ki'n ganny asiste avek dezas ki lanvironnman dan nor, oubyen Cascade, in ariv R21 milyon 75 mil. Tou dimoun in gannyen.

E mon'n vreman soke letan mon'n swiv en deba kot dimoun in anvoy serten pwen kot mwan. En deba ki dir ki Gouvernman pa ti devret rantre, pou asiste dimoun.

Me non! Nou, nou en Gouvernman ki rantre pou asiste tou Seselwa ki dan bezwen! E nou pou kontinyen fer li.

**(APPLAUSE)**

**THE PRESIDENT WAVEL  
RAMKALAWAN**

E Mr Speaker, tou bann *homeowners* zot in fini ganny kontak. Travay pe kontinyen. E

ozordi nou war ki keksoz pe retourn normal.

Me Mr Speaker, mon anvi osi dir avek Lepep Seselwa – e parfwa letan mon regard sa bann program - Mr Speaker, le 7 Fevriye ti fer 2 mwan.

E dan 2 mwan *PMC* in repar 175 lakaz.

Dan 2 mwan in annan plis ki 50poursan lakaz ki'n ganny repare.

Mr Speaker, mon pa ti ekspekte ki poudir dan 2 mwan nou pou'n fini repar 100poursan lakaz! Me i annan serten dimoun ki ti ava – mon pa konnen ki kalite lekspektasyon.

Pourtan Siklonn *Felleng* letan ti tape dan rezyon Anse Aux Pin sepa konbyen lannen pase, ziska ozordi i annan serten dimoun ki ankor pe esper sa lasistans. E nou, dan 2 mwan nou'n tous tou bann dimoun.

E la Onorab Monthy, Onorab Arissol, Onorab Hoareau, Onorab Regina – mon anvi dir avek zot; felisitasyon!

**(APPLAUSE)**

**THE PRESIDENT WAVEL RAMKALAWAN**

E mon vreman apresye ki manner zot in montre - zot in montre ki manner konman en

Manm Lasanble Nasyonal, zot desann lo nivo zot sitwayen. Zot ale pou zot ed zot sitwayen.

E mon osi profite pou mwan remersye tou bann lazans. Pandan sa bann dezans, mon'n war bann dimoun ki zot dan Gouvernman Lokal. La si mon konmans nonmen, mon riske bliy serten. Alors mon prefere aret lanmenm.

Tou sa bann dimoun dan bann diferan lazans, mon'n war ki manner zot in donn tou. E alors mon anvi dir avek zot kontinyen. Parski se sa lespri pozitiv ki nou pei Sesel i bezwen.

E Mr Speaker, la ler aktyel, i annan bann lasirans - bann Lakonpannyen Lasirans in byensir konmans peye. E bann biznes – bann biznes zot in fini pey R5.8 milyon.

E dan bann biznes i annan 80poursan ki'n deza rekonmans fer zot biznes. E i annan environ en pti gin plis ki 100 ki pa ankor konmans biznes aköz kondisyon zot batiman.

E an menm tan osi, mon anvi dir ki lenvestigasyon i kontinyen. Avan ki mon'n vini, mon'n pran lenformasyon. Lenvestigasyon pe kontinyen. E i annan serten lanons oubyen serten keksoz ki ava ganny fer



byento. E tou bann viktim, zot pe ganny lasistans nesaser.

Alor Mr Speaker, letan mon pe al ver mon konklizyon, mon anvi dir avek Lepep Seselwa; pep Seselwa, sa pti nasyon Sesel, pandan sa dernyen 3 an nou'n vin en lafyerte dan li menm.

Nou'n vin en pei, kot ozordi lo lasenn enternasyonal letan ou'n nonm Sesel, tou dimoun i ekoute. Letan ou nonm Sesel, tou bann diferan nasyon i anvi asosye li avek Sesel. Nou sanpyon dan diferan domenn.

E parey zot konnen, kot la gouvrenans, kot la demokrasi osi tou i konsernen, Sesel i laba anler. Si nou pa premye lo en *index*, nou dezyenm. E kot i konsern persepsyon koripsyon, malgre ki parfwa ou a krwar medya i en pe per pou li anonse.

Wi, nou premye Lafrik avek 70 pwen. Dezyenm pei Lafrik i annan zis 56 pwen. E Sesel i lo menm nivo avek *La France* avek *Austria*, avek *Langleter*. Nou pli o ki Lanmerik e bokou bann lezot pei.

Nou kontinyen annan en paspor ki plis ki nou negosye, plis ki nou pou rantre dan bann pei san en *visa*. Mr Speaker, konman en pti pei zil, nou en sanpyon pour bann lezot pti pei zil. E se pour sa rezon ki se

Sesel ki *Chair* tou bann pti pei zil Linyon Afriken.

Alor menm si nou pti, pti, nou en dirizan dan lemonn. E nou bann diferan dimoun dan Gouvrenman, nou ganny envite pou nou partisip dan bann konferans enternasyonal.

Alor mon anvi dir avek zot; annou kontinyen met Sesel pli o. Annou kontinyen annan sa lafyerte pour nou pei. E ozordi Mr Speaker, mon anvi remersye tou Seselwa pour zot sipor. Pour zot lakonpanyman. Pour zot kontribisyon.

Mon anvi remersye tou nou bann *partner* enternasyonal e lokal. E mon anvi fer ankor enn fwa sa lapel pour ki nou reste ini. Nou travay dir. Nou kontinyen mars dan semen rekonsilyasyon nasyonal. Annou sorti e annou al fer en nouvo pa, pou nou sorti dan politik ki popilis. Annou sorti dan politik ki fonde lo bann latak personnel. Annou konman en pep, vin pli responsab. Annou koz laverite. E parey bann lekritir i dir; sa laverite letan nou ava koze, i ava liber nou.

Annou fer en politik konstruktiv e matir. Annou ankouraz nou bann zenn, par nou legzanp ki nou donnen isi menm dan sa Lasanble Nasyonal e deor. Pour ki nou

bann zenn i ava war zot konman bann dirizan dan zot menm.

E byensir atraver tousala, annou sofgard lavenir nou pei Sesel, ki byensir nou leker i bate pour li.

E koman en dirizan responsab, mon anvi dir avek pep Seselwa; mon pou kontinyen servi mon pei avek tou mon abilite. Mon pou kontinyen met tou mon devosyon pou servi Seselwa e nou pei Sesel.

Mon pou kontinyen anmenn nou pei ver en gouvrenans responsab. E se pour sa rezon ki mon dir; les lannen 2024 vin en lannen aksyon. E mon dir avek tou Seselwa, e mon dir avek Lasanble Nasyonal; fer li vin en lannen pozitivite.

Zet negativite dekote, e annou atas nou avek sa ki pozitiv. Annou pa les nou ganny bann distraksyon. Annou bliy tou tapaz, tou distraksyon. E annou met nou latansyon lo travay.

Parey nou dir; *“forget the noise, focus on the work.”* Mon demande ki Bondye Tou Pwisan i beni nou zoli pei Sesel. I beni tou Seselwa. I beni tou viziter ki swazir Sesel konman sa landrwa pou li travay, oubyen pou li vin pran son konze.

E Mr Speaker, parey toultan mon'n dir; nou pa pou...

### **ALL LDS MEMBERS**

... *Zanmen les tonbe!*

### **THE PRESIDENT WAVEL RAMKALAWAN**

Mersi bokou.

*(Standing ovation by LDS Members)*

### **MR SPEAKER**

Lo lapar Lasanble, mon ti a kontan remersye Prezidan pour son mesaz lo Leta Lanasyon. In kouver bokou size ki'n donn nou en apersi son preokipasyon, e osi son vizyon e son plan pour Gouvernman Egzekitif dan nou devlopman.

Mon'n apresye serten mesaz ki tous lideal ki Lasanble i asosye avek. E sa se mesaz lo linite nou nasyon e lo responsabilite endividyel, ki nou bezwen gard an ker nou aksyon e nou panse.

Mon'n apresye osi bann pwen ki in touse ki tous konsern en kantite size ki Manm Lasanble i annan anver zot kominote. E sa se bann size parey pri lavi e kondisyon lavi pour nou bann sitwayen. Sirtou bann ki pli vilnerab e ki pli dan bezwen.

Mon espere ki nou a kapab – Lasanble ek Legzekitiv, travay ansanm pou fer avanse en kantite keksoz ki pou bon pour nou nasyon Sesel e pour nou popilasyon.

Mon remersye ankò e mon konnen bann Manm i konnen poudir Mardi prosen le 27 Fevriye zot a kapab konmans donn zot repons lo Ladres lo Leta Lanasyon.

Mon remersye tou bann Manm our zot latansyon. Tou nou bann envite. E mon pou swet zot bon depar. Mon pou envit nou bann viziter pou zwenn Prezidan e Manm Lasanble dan *lobby* deor lasal, e pou pas en pti moman ansanm. Mon remersye tou dimoun.

En remersiman spesyal pour nou tim Lasanble ki'n organiz sa levennman e osi bann levennman ozordi. E osi bann antite ki asiste nou pou fer sa levennman en levennman ki memorab.

E mon war par egzantp bann zofisye laba avek zot tronpet ki donn nou en bon *salute* sak fwa sa bann levennman. Mon remersye zot pour sa.

E osi manm Lafors Defans ki fer Gard Doner pour vizit Prezidan. Mon swet zot bon retour, bonn sware e mersi bokou ankò. Lasanble i a

*adjourn* e nou a rezwenn Mardi prosen le 27 Fevriye. *Adjourn.*

**(ADJOURNMENT)**

